

BAB 8

Terdapat segelintir golongan muda di negara ini yang masih belum mendaftar sebagai pengundi. Keadaan ini disebabkan oleh beberapa faktor antaranya, mereka masih tidak memahami kepentingan amalan demokrasi berparlimen dalam sistem pemerintahan negara kita. Golongan ini menganggap pilihan raya tiada kaitan dengan kehidupan mereka. Mereka berpendapat sesiapa sahaja pemimpin yang dipilih tidak akan memberi kesan terhadap kehidupan mereka. Pandangan ini disebabkan mereka kurang pendedahan berkaitan dengan ilmu pilihan raya. Justeru, golongan muda perlu diberi pendedahan agar memahami tanggungjawab sebagai rakyat terhadap pilihan raya di negara kita.

Peranan media massa yang sering menonjolkan isu persengketaan dalam kalangan pemimpin politik turut mempengaruhi golongan muda di negara kita. Golongan muda kurang berminat dengan perbalahan dan persengketaan politik yang berlaku yang menyebabkan pilihan raya di negara kita dicemari dengan amalan yang tidak sihat. Golongan muda menganggap semua ahli politik adalah sama sedangkan ramai lagi ahli politik yang berjuang secara ikhlas untuk kepentingan negara.

Masalah politik perkauman turut mempengaruhi golongan muda di negara ini. Isu perkauman yang dijadikan modal ketika berkempen telah melonggarkan perpaduan dalam kalangan rakyat berbilang kaum. Keadaan ini menyebabkan masyarakat berbilang kaum berprasangka buruk terhadap parti politik kaum lain. Sesungguhnya pemimpin setiap parti politik sepatutnya menjadi wadah untuk menyatukan rakyat berbilang kaum di negara kita melalui amalan politik yang sihat dan setiap rakyat mempunyai hak dalam pembentukan kerajaan yang stabil di negara ini.

Amalan kempen politik yang berunsur negatif turut mempengaruhi golongan muda, tambahan pula penyebaran maklumat tentang terdapat segelintir ahli politik yang melakukan rasuah dan tidak berintegriti turut menimbulkan kebencian dalam kalangan generasi muda. Mereka menganggap mengundi ialah satu perkara yang tidak menguntungkan mereka disebabkan imej perjuangan segelintir pemimpin parti politik yang mengutamakan kepentingan peribadi tersebut.

Justeru, golongan muda harus sentiasa didedahkan dengan kepentingan setiap undi mereka sebagai penentu masa hadapan negara.

*(Mana-mana jawapan munasabah diterima)
(Maksimum = 8 markah)*